



Asükwa mongpu Parliament
senden tembangogo

BWF World Tour Finals: Ratchanok
teimla mesamai lir



Niuland-i ak aser akshi bener aruba noktanger

Niuland, December 19, 2025 (TYO): Assam kübok district aika nung African Swine Fever (AFS) prokshiba osangtem nung ajemdaker Niuland district administration-i tenokdangba agütsüogo.

Tangalen nungi Niuland district-i ak mesüra ak chanu den akshi bener aruba khi atema noktanga atar ta Niuland district administration-i

tetuyuba agütsüogo.

Ak war mazüok tashi mesüra tangalen nungi ak bener aruba nung lendong kecha mali ta asüba tashi iba tenokdangba alitsü ta administration-i a metetdaksüogo.

Iba tetuyuba sülen manidakrtem ozüng tapet agi merenshitsü ta parnokisa shisem.

Akashvani Kohima-i Part Time Correspondents bushir

Kohima, December 19, 2025 (TYO): Akashvani Kohima ajanga Nagaland nung district 11 tema Part Time Correspondents (PTCs) shimoktsü osang metetdaksüogo.

Akashvani Kohima-i Chümoukedima, Longleng, Meluri, Mon, Noklak, Peren, Phek, Shamator, Tuensang, Tseminyu aser Zunheboto district tem nung PTCs inyaktüsü atema application

meshiogo.

Tejangrartemi agüja aliba proforma nung tenüng agütsütsü akok aser www.newsonair.gov.in nung 'vacancies' kübok nüngdakba osang aser application proforma angutsü akok ta parnokisa metetdaksüogo.

December 19, 2025 nungi tenzüker anogo 15 tsüngda applications agütsütsüla ta Akashvani Kohima-isa ashi.

Gujarat & Tamil Nadu draft electoral rolls sayaogo

New Delhi, December 19, 2025 (Agencies): Gujarat nung Special Intensive Revision (SIR) agiba sülen draft electoral roll sayaba nung tenüng 7.37 million tema agienogo ta chief electoral officer Harit Shukla-i ashi.

Gujarat indang electoral roll nung tang voters 43.4 million lir. October 27 nung SIR tenzükdang voters 5.08 million liasü ta ashi.

Booth Level Agents aser political party nübotemi aiben jangjashiteptsü aser amalitepa yariteptsü shiaka nisungtemi enumeration forms magütsüba ajanga tenüngtem agien.

Voters süadoker aliba, teti atema tangalen aoba, tesem balala nung tenüng zülüoka aliba aser survey mapang mengutetertem jangjatsü atema door-to-door verification senzüogo ta CEO Shukla-isa ashi.

"Tenüng 73,73,327 agienba nungi tasür 18,07,278, tangalen aoba 40,25,553, absent voters 9,69,662, duplicate registrations 3,81,470 aser other categories 1,89,364 liasü" ta paisa ashi.

January 18, 2026 tashi voter temi inclusion, correction mesüra deletion atema ken o tem benoktsü akok aser election ketdangpurtemi

February 10, 2026 tashi nung ken o ajak jangjatsü aser agientsü. Iba sülen February 17, 2026 nü final electoral roll sayatsü.

Tamil Nadu nunga Special Intensive Revision agiba sülen 97 lakh voters agienogo.

"Tamil Nadu draft list nung tangalen aoba atema nisung 66.4 lakh agienogo, nisung 26.9 lakh süadokogo aser parnok 3.98 lakh tashi tesem balala nung tenüng zülüoka aliba ngutet" ta Chief Electoral Officer-i ashi.

SIR mapang 5.43 crore voters nungi enumeration forms bendenogo aser iba ajanga state nung voters 84.81% ajanga shilem agiba sayur ta CEO-isa ashi.

"Tamil Nadu nung voters 6,41,14,587 nungi 5,43,76,755 ajanga Enumeration Forms agütsüogo aser iba ajanga nübottemi SIR mezüngbuba shilem nung shilem tajung agiba sayur" ta paisa ashi.

Election Commission of India (ECI)-i Hokolbarnü Tamil Nadu aser Gujarat indang draft electoral roll sayaogo. ECI-isa Mongulbarnü West Bengal, Rajasthan, Goa, Puducherry, aser Lakshadweep indang draft electoral rolls sayaa liasü.

PM Modi-i tanü Assam semdang, Mapatong aika sayatsü

Guwahati, December 19, 2025 (Agencies): Prime Minister Narendra Modi-i December 20 nungi tenzüka anogo ananü atema Assam semdangtsü.

Iba ya Assam atema kanga dang tongtipang aser tajangzüak aketba sentong ka lir ta Chief Minister Himanta Biswa Sarma-i tanü state BJP headquarters nung osangbener dang ashi.

Assam nung sangküm Assembly elections agitsü liaka Prime Minister-i semdangba ya election atema ta mebilemtsüla. PM Modi-i linük lennir ka ama iba mapa inyaker aser Assam renlochtsü aser sobaliba agizüchtsü atema pai semdang ta CM Sarma-i ashi.

PM Modi-i Honibar anüngdang Guwahati tonga arutsü aser pai mezüngbuba sentong nung adenbaji taoba Assam chief minister Gopinath

Bordoloi indang kürakyanglu ka sayatsüba asütsü.

Gopinath Bordoloi ya Congress lennir ka liasü aser Atal Bihari Vajpayee-i aniba sorkar mapang Bharat Ratna ngua liasü.

Prime Minister-isa Lokpriya Gopinath Bordoloi International Airport nung Rs 4,000-crore terminal tasen lapoktsütsü aser idakji lokti sentong ka nung jembitsü.

Lokpriya Gopinath Bordoloi International Airport nungi Modi-i roadshow ka anir BJP headquarters, Bashishta tashi agitsü aser idakji pai party züngsemtem den ajurutepe sensaksemtsü.

Prime Minister kati Assam nung BJP office ka semdangbaji tang mezüngbuba asütsü aser iba ya Assam nung BJP atema tongtipang mapang ka asütsü ta CM Sarma-i ashi.

PM Modi-i Koinadhora, Khanapara nung aliba state guest house nung yipzüchtsü aser Deobarnü 'Pariksha Pe Charcha' kübok takok tajung anguba kaketshir 25 den interactive session ka nung shilem agitsü.

Iba sentong ya Brahmaputra river nung cruise vessel Charaideo ka nung agitsü. Modi-i Brahmaputra ayong kanga meimer ta Sarma-i ashi.

Deobar anüngdang Modi-i Assam Movement nung taküm bendanga agütsür 860 nem tetushi agütsüba nüngshilung Swahid Smarak Kshetra semdangtsü aser iba sülen Namrup-i aotsü.

Idakji pai Rs 12,000-crore ammonia-urea fertiliser plant atema lung azünga yutsütsü. Iba mapatong ajanga Assam nung industrial aser economic growth len anitsü ta CM Sarma-i ashi.

Assam Congress-i tanü nungi mass outreach yatra tenzüker

Guwahati, December 19, 2025 (Agencies): Assam Pradesh Congress Committee (APCC)-i December 20, 2025 nungi mass outreach yatra tenzüchtsü aser idangji tesem balala nung sensotem, sendaktepa alirtem aser party züngsemtem ajak den indangindanga ajurutepe sensaksemtsü.

Iba sentong ya tang tagidak people-centric campaign 'Raijor Podulit Raijor Congress' nung shilem ka ama lir aser nübottem dang asüngdangtepa manifesto renemtsü atema nükjidong nung inyaker.

Iba yatra nung shilem ka ama Indian National Congress tanishirtem den MLA, MP aser tongti lennirtemi state ajungalen nisung ajak den ajuruteptsü.

Iba sentong nung aluyimertem, mapa inyakerem, kaketshirtem, shishilembartem, entrepreneurs, tetsürtem, shishashirtem, lokti teloktem aser lokti lennirtem nem shilem agidaksütsü aser "New Assam" atema roadmap ka renemtsü.

Iba atema field teams pungu-

Upper Assam, Central Assam, Barak Valley, Bodoland, Hill districts aser Lower Assam lemsar inyaktüsü.

Iba maparen atema bus pungu renema lir aser headquarters nung central coordination team kati field operations reprangtsü. District ka nung anogo ka lemsüchtsü aser telok shiai anogo ka nung district ka asemtsü.

Iba 'Raijor Podulit Raijor Congress' campaign ya Dibrugarh nung December 6 nü tenzüka liasü aser iba ya Congress manifesto atema asüngdangya tenzüka liasü.

Nisung teimbai shilem agidaksütsü atema APCC-i www.natunaxom.com ta ser digital platform ka lapokogo aser iba ajanga sensotemi online ajanga tebilembatem lemsateptsü akok.

"Mezüngbuba mera ka ama onoki Assam nung higher education system atema shisatsü aser tebilembatem meshir. Assam kübok college aser university tem nungi

kaketshirtem den sensaksemtem jenjang tajungba kümdaksütsü, research & innovation akangshitsü aser kaketshirtem tashi itdaksütsü nüngdakba ajitetogo" ta APCC President Gaurav Gogoi-i ashi.

Assam Congress-isa December 6 nungi tenzüka district balala nung "Aspiration Boxes" enoka aoer. Parnoki marketplaces, tea garden lines, tea stalls, bus stops aser tanga public areas nung 4,000 boxes tema yutsütsü sentong lir.

"Nisung telok ka dang masü saka ajak atema state ka asütsü onoki mangdang ayur. Digital putu ka nung nisung ajak den tonga oa ajuruteptsübaji tamakoktsü saka iba sabang ajanga asenoki ajak den sendakteper" ta Gaurav-isa ashi.

"Onoki aluyimertem, mapa inyakerem, kaketshirtem, dokan kiburtem, tetsürtem, shishashirtem, lokti teloktem aser entrepreneurs den ajurutepnür aser parnoki ajangshibatam amshia Assam asen atema asalentong yanglunür" ta paisa ashi.

Sairang railway station nung ita 3 tsüngda ILPs 18,000 tema agütsüogo

Aizawl, December 19, 2025 (Agencies): Taküm September 14 aser December 17 tsüngda Aizawl district police-i Sairang Railway Station nung Inner Line Permits (ILPs) 18,193 agütsüogo.

Iba inyakyim ajanga Mizoram telungi aiterem kanga junga mita anükba sayur ta Superintendent

of Police Zosangliana, IPS-i ashi.

ILP agütsüba nung 60% jungnüa tourists nem agütsü aser tanüngba 40% ji aayanger nem agütsüba liasü ta SP Zosangliana-i ashi.

Kasa mapang tsüngda police-i train nung nisung asem ILPs mebeni aruba atema meyipa yok aser district nung meshimetsür

36 agien ta paisa ashi.

Mizoram kübok police station ajak nung hopta shia ILP verification drives agir. Tang tashi nung ibala drives 160 shi agiogo aser idangji nisung 932 tashi valid permits maliba mesüra invalid ILPs bena aliba puteta liasü ta SP Zosangliana-isa metetdaksü.

Kohima nung Good Governance Initiatives and Practices workshop ayongzük



DC Office Kohima nung December 19, 2025 nü good governance week amungba mapang tangokba noksa ka nung Deputy Commissioner, Kohima, B Henok Buchem den DC Office Kohima indang ketdangsür aser staff tem angur.

Dimapur, Luchii/December 19 (TYO): Kohima District Workshop on Good Governance Initiatives and Practices sentong "Prashasan Gaon Ki Ore" omen nung ajemdaker December 19, 2025 nü Deputy Commissioner, Kohima undang Conference Hall nung agia liasü, kong Deputy Commissioner's Office, Kohima nungi ketdangsür aser staff temi shilem agi.

Iba sentong nung Deputy Commissioner Kohima, B. Henok Buchem, NCS ajanga jembidang, junga ketdang asütsüba ya mapa shidak ochishia aser nüburtem nem service shidak agütsüba nung tera yanga lir, ta ashi.

Junga ketdang asüba ya India aser alima ajunga nung yimya ka ama kumogo, ta pai ashi aser governance systems tajung aliba linüktem rongnung Singapore aser Scandinavian ya tajungtibatem lir ta ashi.

Nagaland asoshia governance mechanisms tashi itshia tejakleni aotsü nüngdaker, aser iba dak sendakba nung tatishitsü tajung sayutsü asoshi Kohima district aser talisa

Kohima DC Office ya lir, ta Buchem-i ashi.

Deputy Commissioner-i file ketdangsüba aser record ayuba nung tali rangloker office inyakyim ajungtsü nüngdaker ta ashi. File covers shidak amshitsüla, indexing shidak alitsüla, notesheets kanga junga anepalutsüla aser sorkar indang offices nung ochishia aser takok ngua inyaksü atema mapang shidak nung files amshitsüla, ta ashi.

Pai digital aser offline processes meyoktepba hybrid governance indanga rateta ashi. Iba system kübok documents ya scan sür mobile applications ka ajanga upload sütettsü, aser ibaji ajanga inyakyim nung mapang agiba aser paper mapa tajemba kumdaktsür, ta ashi.

Records ajunga software database nung kanga junga rizünga ayutsüla, aser ibaji ajanga tekeraba nung amshiteter aser administrative inyakyim tajungba kumer agizüka amshitettsü.

Buchem-i ketdangsür ajunga dang district nung governance tajungba kumdaktsütsü asoshi

teka amteper inyaksü ayongzüka liasü.

Iba sentong nung SDO (Civil) Rorheu Peseyie-i district indang Vision and Strategic Framework indang PowerPoint presentation ka agütsüba nung yimdakyimtsüng nung aliba nüburtem anasatibai sorkar indang services bener arutsütsü nükjidong nung "Prashasan Gaon Ki Aur" omen kübok nüburtem tiyong südaktsüba sorkar inyakyim indang lemsatepa liasü.

Tali ochishia inyaksangshitsü, local institutions nem tashi agütsütsü, sustainable development jenjang ajungkettsü aser sorkar indang services tem kishizüng tonga bener arutsütsü atema mera balala agiba indang pai lemsatepa liasü.

Iba sentong nung EAC Imtiyenla K menden liasü, aser ADC Kohima, Roupfukuotuo Noudi ajanga District @100 indang presentation ka agütsü aser EAC Kohima, Ane Khieya-i melepzüng o jembia sentong tembang.



Administrative Training Institute, Nagaland, Kohima nung jeli Christmas sentong ka December 19, 2025 nü ayongzüka liasü. Iba sentong nung V. Shashank Shekhar, IAS, Director General ajanga Christmas salem lemsatep aser Asalie Lese, NCS, Deputy Secretary ajanga o jembia liasü. Sentong nung NCS (Probationers) 2025 batch aser Timsen Jamir nungeri temeja ken aten, Bendanglila, NCS, Additional Director (Admin) aser Vipievonuo Pienyü, LDA-cum-Compute Assistant nati Lai azüng. Iba sentong nung Bozizo Tetseo, NCS (P) 2025 batch menden liasü.



NATIONAL EDUCATION SOCIETY FOR TRIBAL STUDENTS (NESTS)

An autonomous organization under Ministry of Tribal Affairs, Govt. of India
Gate No. 5, Jeevan Tara Building, Parliament Street, New Delhi-110001

NOTIFICATION

Eklavya Model Residential Schools Staff Selection Examination (ESSE)-2025 NESTS has announced the recruitment of Teaching and Non-Teaching staff for Eklavya Model Residential Schools (EMRSs) through ESSE-2025. The Tier-I Examination for the posts of Hostel Warden, Staff Nurse (Female), Junior Secretariat Assistant (JSA) & Lab Attendant will be held on **21 December 2025**. Candidates are advised to download their admit cards from the link provided below:

<https://examination-services.nic.in/AdmitCardService/Admitcard/Login?apprefno=102992511>

The candidates are advised to visit "www.nests.tribal.gov.in" for future updates.

Issued by NESTS

Chümoukedima nung Beauty Barn lapokogo

Dimapur, Luchii/Dec.19 (TYO): Hokulbamü Chümoukedima district nung Beauty Barn store tasen ka lapokogo.

Beauty Barn ya Toinali Chophi-i 2016 küm kidang nungi tenzük aser tangbo iba start-up ya tesem balala nung züina aor.

Iba store lapokba sentong nung Chophi-i jembidang, taruba küm Kohima nunga ka lapoktsü sentong aliba lemsatep aser ano yimti balala nung lapoktsü atema asameyangba mapang lir ta ashi. Iba brand ya Mizoram aser Arunachal Pradesh nunga kongsang lir.

Beauty Barn ya Instagram nungi tenzük social media aser website nungi customer tem den sendaktepa arur küm ter majungdang Dimapur aser

Chümoukedima nung store ka ka lapoka lir.

"Iba ama stores lapokba ajanga online shipping dang masü consultations aser hands-on service agütsüteter. Online aser offline nung oset ayokba junga lir, saka nüburtemi mongin tem shisatsü aginer," ta Chophi-i ashi.

Nagaland nung Beauty Barn store amenokba ajanga linük tesem ajunga nung customer tem den sendaktepba den lanurtem sempet tajungba nung amshiteter.

"Onok nükjidong ya mapa agütsütsü aser skills alirtem Nagaland-i arudaktsütsü lir. Tang onok nisung 50 lir aser shilem 90 jungnüa Naga nunger lir," ta lai ashi.

NPP Nagaland pur Christmas yongya sentong agi



NPP Nagaland State züngsemtem Hokulbarnü Dimapur nung Christmas yongya sentong agidang tangokba noksa ka yangi angur.

Dimapur, Luchii/December 19 (TYO): National People's Party (NPP), Nagaland State pur Christmas yongya sentong ka Hokulbarnü NPP Nagaland indang kimen, Simon Yephthomi'er kidang Deobarnü agia liasü.

Iba sentong nung NPYF Nagaland State tir Yabang Limchen menden liasü aser state executive member, NPP, Tsuktirenla Longkumer-i sarasadema sentong tenzük.

Iba sülen teloki ka aten aser NPWF Nagaland tir Audrey Jamir-i Lai azüng.

NPP Nagaland tir aser MLA A Nyamnye Konyak-i party lenirtem aser züngsemtem dangi Christmas salem abenba mapang Yisu Khrista asoba ajanga

ajungmesoa yimjung, telungiem aser ajemalua alitsü ayongzüka liasü.

Sentong nung NPP Nagaland indang tatong tir aser odongtar tongti K James Vizo-i Christmas benjongmung indang rateta jembidang teimla, bendanga agütsüba temeim aser dangar dang aria bilemba mulungsentsü alitsü aser nübur tenzükba mapang temulung agüja tangatetba tajung nung inyaksü ayongzük.

Iba sentong nung Heli Wotsa-i Christmas temeja ken ka tena lokti ajungmesoa liasü.

Imnatoshi Longkumer, Associate Pastor, DABA ajanga Tsüngrem o jembiba sülen state, linük aser nüburtem asoshi lokti sarasadem mapang agia liasü.

Electric Cool Kid-i tanü "THIS IS NOT POP!" kensep sayatsü



Dimapur, Luchii/December 19 (TYO): Electric Cool Kid ajanga December 20, 2025 nü streaming platforms tulu ajunga nung EP (Extended Play), THIS IS NOT POP! sayatsü.

Tawa Music Awards of Nagaland 2025 nung Best Rock Song sempet anguba single "Walking Through the Fire" ken sülen iba kentener telok asoshi

EP ya sayar asütsü.

EP rollout nung shilem ka ama The Electric Cool Kid yagu "Mafia" indang official music video ya December 23 nü premiere asütsü, koba EP nungi standout tracks ka lir.

Updates aser osang tali jangjatsü atema The Electric Cool Kid indang social media sapang tem nung angutsü.

Asükwa mongpu Parliament senden tembangogo



December 19, 2025
nü Rajya Sabha
senden tembanga
linük naklu ken
a t e m d a n g
z ü n g s e m t e m
nokdaka aliba noksa
nung angur. Asükwa
mongpu Parliament
H o k o l b a r n ü
tembangogo.

New Delhi, Luchii/ December 19 (Agencies): December 1 nü asükwa mongpu Parliament senden tenzüka liasü aser Hokolbarnü (December 19) tembangogo.

Anogo 19 tashi amenba senden nung Lok Sabha nung kanga tongtibang bill aika agizüka liasü, aser item bill rongnung nija company tem atema civil nuclear sector aser MNREGA melentsü atema benokba VB-G RAM G Bill densema lir.

Lok Sabha nungsa 'Vande Mataram' ken küm 150 ajungba

aser SIT (electoral reforms) dak sendakba nung o entepa liasü. Ano higher education regulator amenoktsü atema benokba bill kabo House anaprongla nungi züngsemtemi akümba joint committee ka nem agütsü.

Ano market securities code dak sendakba bill ka benok aser ibaji maneni asadangtsü atema department dak sendakba standing committee ka nem agütsü.

Hokolbarnü senden tenzüka sülen mapang tatsüka tsüngda Lok Sabha nung Om

Birla-i senden tembangba sangdonga liasü.

Hokolbarnü Rajya Sabha senden-a tembangogo. Chairman C. P. Radhakrishnan-i anogo 15 nü tashi amenba senden nung jembia arubatem tongmelang agi metetdaksüba sülen linük naklu ken atem, iba sülen Chairman-i senden tembangba metetdaksü.

Asükwa mongpu Parliament senden nung linük nung mopung kanga menena akümba tebilemtsü onük nung o melemtepi liasü.

Bangladesh nung loktii Hindu nunger ka tepset

New Delhi, December 19 (Agencies): Brihostibar aonung Bangladesh kübok Mymensingh district nung Hindu nunger lanur ka loktii tepsetba sülen süngdong nung alener arongba ajanga tensa kanga mejungi kümogo.

Hindu nunger lanur jagi Tsüngrem mezügmeshi, ta tai tonglokja loktii tepset.

Iba nisungbaji Dipu Chandra Das liasü ta police-i jangjaago. Pa ya süoshi yangluba factory ka nung mapa inyaker ka aser iba tesem nungji para kidang liasü.

"Ainkar (Muhammad) mezügmeshiba atema Brihostibar aonung 9:00 ako meta lokti kati tejashi nung pa apuba sülen pa dak azük. Iba sülen pa mang nung ni senoktsü," ta police ketdangser Ripon Mia-i metetdaksü.

Post mortem agitsü atema tasümanngji Mymensingh Medical

College Hospital-i bener ogo.

New Delhi nung Parliamentary standing committee on external affairs-i, Bangladesh nung tensa tamajungba dang akümer, ta metetdaksü.

Committee jagi, "Yaküm August ita nung Bangladesh nung yimtenren dak sendakba mepetmesü adokba sülen rara tatalokbatem, minorities, osangbenertem aser shisashirtem amakba kanga bulua ataloker," ta metetdaksü.

Ministry of external affairs-i committee dangji, Bangladesh nung Hindu nunger densema minorities amakba atema India-i tebilemtsü akar, ta metetdaksü.

Ministry-isa, mapang shia India-i Bangladesh nung interim sorkar dang par linük nung minorities kümzüksü atema inyaksü ajungshir, ta metetdaksü.

Küm 5 tsüngda Mid-Day meal program kübok school 84,000 agien

New Delhi, December 19 (Agencies): Centre sorkar indang PM Poshan Shakti Nirman school (mid-day meal programme) kübok tesüiba küm pongu tsüngda school 84,000 dak tali agienogo; joko item school nem iba scheme kübok teyari magütsür.

Parliament nung tasüngdangba ka langzüdang Ministry of Education-i, PM Poshan Shakti Nirman scheme kübok 2020-21 kümsük nung school lakh 11.19 liasü aser 2024-25 kümsük nungbo school lakh 10.35 dang kümogo, ta metetdaksü.

Iba scheme kübok school 84,000 dak tali agienbaji school shilem 7.5 shi agienba lir.

Coronavirus wara mapang nung iba scheme kübok school

meyirjang aika agiena liasü, saka wara anenba sülen-a iba scheme kübok school aika ajema aküm.

Talisa Uttar Pradesh, Madhya Pradesh aser Assam ama state tem nung iba scheme kübok school aika ajema kümogo.

Education ministry-i, "Iba scheme benoktsüji state sorkartem aser Union Territories dak tuluka keta lir. Iba dak alia iba scheme kübok school tem aika ajema akümbaji school tem loktepba, school shibangba aser kaketshirtem ajema akümba kulitem ajanga lir. Iba scheme kübok school ajema akümyonga tang tashi anüngdang school tanur crore 8.5 dak tema nem chiyungdaksür," ta

metetdaksü.

Minister of State for Education, Jayant Chaudhary-i, tesüiba küm pongu tsüngda Pradhan Mantri Poshan Shakti Nirman (PM Poshan) kübok item ama tatalokba 11 liasü, ta ashi.

Iba scheme kübok school aika ajema akümba atema kanga sensaker kibongtem nungi school tanurtem atema tebilemtsü katsüba aika lemsatepogo.

Maharashtra densema state aika nung sorkari Poshan (mid day meal) kübok joko antzü magütsüba atema tsürabur aikati mepelaba lemsatepogo.

Taküm February ita nung Maharashtra state sorkari antzü nung indokba sen crore 50 magütsütsü telemteba agia liasü.

Opposition-i aonung piyong VB-G RAM G Bill anema longkak ait

New Delhi, December 19 (Agencies): Parliament nung VB-G RAM G bill agizükba anema Brihostibar aonung piyong (ghonda 12) opposition züngsemtemi longkak ait.

Iba bill ya ajanga MGNREGA rural employment program melentsü.

Opposition lenirtemisa linük tesem ajaklen longkak aittsü amokmerenogo.

Trinamool Congress nungi Rajya Sabha nung deputy lenir MP, Sagarika Ghose-i, Union sorkari VB-G RAM G raksatsür, ta aitsü.

Opposition-i longkak aityonga ayaterm nung Rajya Sabha nunga Viksit Bharat

Guarantee for Rozgar and Aajeevika Mission (Gramin) (VB-G RAM G) Bill agizük.

Ghose-i, Modi sorkari iba bill benokba ya sensakertem anema, nüburttem anema, aluyimertem anema, yimtsüngtem nung sensakertem anema lir, ta aitsü.

"Iba ya India nung sensakertem anema, iba ya Mahatma Gandhi mezügmeshiba lir aser Rabindranath Tagore mezügmeshiba lir. Ghonda pongu notice ajanga onok nem iba bill agütsü. Iba bill nung o enteptsü atema mapang peria magütsü," ta Ghose-i ashi.

Ghose-isa, "Iba ama tongtibang bill yabo Select Committee ka nem agütsütsüla aser opposition party tem tsüngda o lemteptsü atema mapang agütsütsüla, stakeholders nem o lemteptsü atema mapang agütsütsüla, ta onoki takhangba agüja liasü. Iba ya democracy tepsetba lir," ta metetdaksü.

Congress general secretary Randeep Singh Surjewala-i, "Iba ya linük nung aayangertem atema tejashi anogo ka lir. BJP sorkari MGNREGA agienba ajanga aayanger crore 12 anema inyakogo. Modi sorkar ya sensaker anemertem aser aluyimer anemertem, ta parnoki kuli sayuogo," ta metetdaksü.

Congress lenir Mukul Wasnik-i, "Tamalen MGNREGA renemba mapang nung iba atema ita 14 o lemtepa aru aser Parliament nung ajaki melungtepa agizüka liasü. Tang iba scheme ajanga state temi khuret tulu ajangshitsü, aser ibaji ajanga iba scheme laotsü," ta ashi.



BAPTIST CHURCH CHANGKI

QUASQUICENTENNIAL

B E N J O N G M U N G

TSÜNGREM O JEMBIRTEM



Rev. Temsu Jamir
Executive Secretary, ABAM



Rev. Dr. Akok Amri
Pastor, Impur Baptist Arogo



Mr. Sakurepba Tzüdir
Pastor, Kohima Ao Baptist Arogo

Omen : "Kibuba Tenüng Uludakjang"

“Changki nunger senso ajak, anük-apang aser temeimertem ajak pelashishia jaoker”

ANO GO : 10TH & 11TH JANUARY, 2026



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUCHII 20, 2025

Aji ni asü?

Tsüngremi meimchir yanglur külen ibaji ngua temulung süa ashi, ya kanga junger. Tsüngremi meimchir yangluba sülen nisung shia nem sempet balala agütsü. Pai kar nem kententsü, kar nem sayutsüngitsü, kar nem tesayur asütsü, kar nem tobur tajung, kar nem ali rongsen, kar nem chirnur, etc. ta nisung ajak lenmang balala nung moatsü. Pai temoatsü balala agütsübaji item ajak jagi Pa sentsüwangshidaktsütsü asoshi liasü. Aji saka alima meimchirtemi Tsüngremi nükjildingji matalokdaktsüi tatidang nung tsüka lenmang tezüleni prokshia ao. Laishiba nunga kodanga reprangdangdir Yisu ya pa nütsüng kati ashiocksüba indang shia lir. Yisu ashiocksüsang Iscariot Yihuda ya tekolok tajung, shisa taka, senotsü ketdangsütsü metetba nisung, wainshin akaba tenzüker, shishilemba tashi, temulung lemtetba nisung, lenir asütsü sempet tajung aketba nisung. Item ajakji Tsüngremi pa nem agütsüba sempettem liasü. Pa dak sempet tajung keta alibaji ngua Yisui par telok nung Iscariot nem ya sen juliji amdaktsü. Iscariot ya Kümtetdakba Khrista den mapang talangka lia aruba nisung, Yisui sayuba ajak pai angashia liasü. Yisu sülen tesem balala ajak nung senzüba tenzüker, Yisui sayatenya inyaka nükpoker ngudaktsüba, tsüngtsüker jajadaktsüba, küm aika shiranga alir anebsüba, temenen tanelai aridokja salatsüba, nisung meyi pungo chiyungdaktsüba, tasür shia arudaktsüba amalatem ajak Iscariot jagi ngua liasü. Kechiaser paji telok senpong amsang asünung pa medeni Yisu nütsüngtem kongia mouka südi. Anungji Yisu sülen mapang ajak nung anidaksangji nütsüngtem rongnung pa ya sür südi. Aji saka kenü anogo Yisui nütsüngtem dang o ka yamai ashi - "shibai kü den ausu ka nung pei teka amüoker, iba nisungjagi ni ashiocksütsü. Nisung chir, pa indang zülua aliba ama aotsü; saka shiba ajanga Nisung Chir ashiocksüdir, iba nisung asoshi ayatai! Iba nisung asoshi pa mesoi ali tajungba süla. Aser pa ashiocksüba Yihudai ashi, "Tesayur, aji ni asü?" Yisu pa dang ashi, nai shiogo." Mathi 26:23-25. Laishibaji asenoki kanga junga züngdangra yamai shia angutsü - Iscariot Yihuda ya pai abenba sen juli jagi atidang. Tanga alima talang nungi aruba langka ka agi pa matidang. Mesüra temenen tanela ka arua pa memesüzük. Yamaji tanüa asen akaba rongsen mesüra Tsüngremi asen nem agütsüba sempet, mesüra anogoshia asenok sotaka aliba wadang aser mapa jagi asenok atidangtsü. Asenok Khristantem aikati kümtetdakba Yisu Khrista indang aikasa meteta lir, saka Yisubo memetet. Yisu indang metetba jagi masü saka Yisu tejangja meteta Paji agizükba ajanga dang asen taküm nung Paji jungkai adoktsü aser medemsortemia asen dak Yisu tobur ajungbaji angutsü. Yisu masü Pa indang kija metetba nisungtem jagi Laishiba tekonga aika meteta alitsü, sentepia meranga aotsü, sayutsüngibaa aika angashir alitsü, arogo nunga tenzüksü, tenlatenjia agütsütsü. Parnokji tema tereprangtsü nungbo Yisu tembar tajung ama, saka tesasatsüka Yisubo tejangja memetet aser magizük asünungji taküm nung tatidang balala arudang lisem lima nung asüba ki mesüka takümji septsülen ken, tentsülen ken ta tatidang mopungsem nemji ayipzüa onshishidaktsütsü. Iscariot Yihuda yagia Yisu indang dang masü saka pa mulung taroktiba nung Yisuji agizüka Yisuji shibar metetadoker ali asübo pai anogoshia bener jajaba sen juli jagi pa atidangdang zübazübaa koktetla. Asen nem Tsüngremi sempet tajung aika agütsüogo. Tangar aika dang nungi balaka asen taküm/kibong temoatsü manung jangratema alir, saka ano item jagi tenük mesüngi lenmang tezülen awazür asü? Mesüra Tsüngremi asen nem angati agütsüba sempet tajung jagi asenok taküm lenmang tezüleni anir odaktsür asü? ta asenoki asen takümji anogoshia seret odanga alitsüla. Meimchir nem Tsüngremi maongka aika agütsüba rongrong tulutiba kaji, 'pei sasa telemtetba agitsü agütsüba' ya lir. Anungji asenoki telemtetba shita agia ochi lenmang nung Yisu sülen marakzüi jajatsü shimtetsü asoshi mapang ajak nung asen takümji mita alitsüla. Iscariot Yihuda ama Tsüngremi asenok nem agütsüba temoatsü jagi asenokbo memesüzükdaktsütsü kümdanga alitsüla.

OLEMSABANG

“Manokshiba Lung”

Sakurepla Longkumer

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

La mulungjang nung arubaji ya dang liasü-" Kinungbo küna balaluya asünungbo tanur asem tia ayatai asütsü aser kechi komaka asüyong küla ni asoshi tanur asemji ajak dang taoba, anungji ni ozü kibong kümzüksü." Ashilai la taküm Medembai ashiocksüa raksatsüba dak meranglok saka tanur asem tia dak rangloker kechi komaka asüyonga lar kibong kümzüksü aser Tsüngremi la yaritsü ta tamang tulu liasü. Anogo ishika süir kinungbo ainlen nungi shilang aser kibong den tanaben lungjem. Ashilai chirnurtem ajak mejanger külen kinungbo dang tatalokbatem ajak ashi. Medembai kodang aji angashi, pa kanga aoksa aser idangyongjisa apudaker pai kanga tai inyakogo ta tatok meshi. Ashilai komasür tebu tajung kati yamai inyak ta asüngdangdang, Medembai langzüa ashi, pa teti mapai aodang Ajunglar dokan nungji tilaterisa alir aser idangji tena metetepa aküm. Tena tesendaktep tera tali küma aodang tenati meinyaktsü mapa inyakadok ta ashi. Saka Medembai tena joko piladokogo aser kecha mali ta ashidang Ashilai süra kinü tanur mesoi alibaji koma asütsü ta asüngdang nung Medembai tanurji mesoi raksa endoktsü ta ashi. Ashilai iba o angashia kanga jashi aser kinungbo dang yamaji kodanga meinyaktsü kechiyong iba atakatam Tsüngremi nungi arubajibo parnoki metizüktsü aser kechi komaka süaka kinü tanuribo kecha tai meinyak. Anungji tanurji asotsü aser par kibongi reprangtsü ta lai kinungbo ta ashi. Medembai kinungtsüi iba tashi yimli tajung sayur nu ta pela saka temulung raksaa pa mulung nung ajep. Iba aonung Medembai kinungtsüi ashiba ama inyaktsü nangzük aser Ajungla dangia phone süa o ajak hai haura kaa jembir mejang.

Alima nung molumi ajangshi Anogo ka nungi ka ta süia aodang, Taochir kibong nung temeim aser teputep tera rosepa aküm. Medembai tanur asem aser kinungtsü nem mapang magütsü aser lia liabo mapa nungia menur arua kibong tekülem nung aibensa maten. Ashilai kinungbo dang ya kechi küma aor ta asüngdangdang kecha melangzüi ajem ajema ali. Mapang tatsüka dang lirbo Medemba kidangi marui aküm aser itasen ishika dang bener arutsü tenzüker. Ashila kanga taremsük tetsü ka süaka itasen junga bener maruba agi kidang metokmeperi agi asüng aser khen khenbo la kanga jashia liasü aser kinungbo dang kechi nungsa sen yamai endoker ta asüngdangdang pa mapa tongtibang kar nung endok ta ashiba dak alaka kecha mashi. Anogo nungi ita ta renteta aodangbo temesepba chiyungtsü dak Medembai tenük yok aser kodang mapa nungi kidangi shilangdir, kinungtsü aser chirnur ngua pa jashi aser lia liabo tilateri ajak nung yakta dang ain adoka pai par kibong dak teka sangshitsü tenzüker. Ashilai kodang kinungbo dang sayubentsü tajung shia pa azüoktsü shidir mesüra tanurtemi parnok school nung nüngdakba osettem alitsü indang shira, parnok ajak taktang telungbai anir aitsü aser shiruru daka nisungi mebenshiba aser meinyakbatem pai kinungtsü aser tanur asem dak inyak temeimtsüka azük. Medembai azükdang parnoki ola adoka jepira ano tali dang azüktsü ta merenshi. Kiyongertemi Taochir kibong ya yamai akümer nu ta aoksatep. Medemba jakla shisatsü yamai akümstü yabo pungmang nunga mepungmangsem tasa kiyongertemi jembi. Alima nung molumi ta asübaji Taochir kibongi ajangshia liasü. Medemba taküm melenshibaji tanga kecha agia masü saka alima shi azü nem pa taküm kokdaktsüba agi liasü. Tesüiba aonung ka pai kinungtsü dang nangzükba to amadoker Ajungla dangi sa tanaben meyip aser itasen ajak la dak indok aser par kibongbo ayatai tia nung toktsü. Par kibong lia aruba aser Tsüngremer taochi indang mebilemdangi pai pa taküm alima tejangraba nem bendanga agütsü koba ajanga khenü anogo teyanglur Tsüngremi pa tenarong tashi agi mesüktsü ta asübaji amadoker temenen nung dang nemzü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Operation Christmas Child kübok tanur million 12 nem sempet agütsütsü



December 12, 2025 nü Maryland nung Samaritan's Purse indang Mid-Atlantic Ministry Center nung Operation Christmas Child project kübok Khristmas mapang tanurtem anem sempet lema agütsütsü atema sempet aleptsüadang tangokba noksa nung angur.

Maryland, December 19 (Agencies): Khristmas mapang nung alima tesem balala nung tanur million 1 nem sempet agütsütsü atema Maryland kübok Baltimore area nung aliba Mid-Atlantic Ministry Center nung volunteers noklang aikati renemtsüdar.

Rev. Franklin Graham-i, Baltimore nung aliba center nung 'shoeboxes' million ka renemtsütsü saka Operation Christmas Child project kübok taküm tanurtem nem sempet million 12 dak tali agütsütsü tebilemba lir, ta metetdaksü.

December 12 nü Operation Christmas Child dedication sentong nung sayutsünger Rev. Franklin Graham-i volunteers atema sarasademja liasü.

Alima tesem balala nung tanur million 1 nem box nung tsüngsem, school supplies aser kazütsü oset balala septsüba maparen nung volunteers 11,000 dak temai yaritepdar.

'Operation Christmas Child' ya Khristan missionary

program ka lir. Parnoki United States, Germany, United Kingdom, Canada aser South Korea linüktem nung aliba Arogotem den longjemer Khristmas mapang tanurtem nem sempet agütsür. Iba sentong ya Khristan melungtet telok, Samaritan's Purse-i achaayanger.

Volunteers-i tanur kazütsü oset balala, pen, pencil aser tanga supplies balala box nung septsü tenzüikogo. 'Shoeboxes' sempettemji Ukraine densema Africa aser Asia nung aliba linüktem nung tanurtem nem agütsütsü.

Rev. Franklin Graham-i, "Linük (US) nung item sempet renemba ya tanurtem dang 'agütsüba' koda tongtibang, ibaji angazükdaksütsü atema lir. Tarutsü lanurtem dang agütsüba ya koda tongtibang, ibaji sayur. Alima nung temeim aliba aser tagütsünüba linüktem rongnung America ya temaba jenjang nung lir. United States-i agütsüba amabo

shingaia magütsür," ta metetdaksü.

"Tanurtem dang tangar yaritsü atema tesayuba agütsütsüji kanga tongtibang," ta pai ashi.

Iba maparen nung yariteptsü atema Maryland nung alirtem dang masü saka US kübok tanga state 10 nungia temelunger volunteers aika liasü.

Linük balala nung nüngdak apir tanurtem nem sempet agütsütsü atema Samaritan's Purse-i Arogotem den tongtepratepdar, ta Graham-i ashi.

Graham-i, "Onoki Tsüngrem nem sentsüwangshi ajak agütsür aser iba facility (Centre) atema Pa dang pelar. Küm ana tejaklen ni iba building semdanga liasü, aser iba mapang nungjibo iba building ya ochimashi bushisüngdangba facility ka liasü," ta metetdaksü.

Samaritan's Purse-i iba building yanglushiba maparen nung sen million 16 shi indok.

ANOGO ABEN TSÜNGREM DEN

Tsüngrem Tenüng Sangang

"Pa mejembitetba sempet asoshi Tsüngrem tenüng sangang." 2Kor. 9:15.

Küm nung mongpu rong nung tajungtibaji Khritmas mongpung ya lir. Ibai sempet agütsütepba mopung lir, saka aiben iba tetezü atena oa sempeteper. Khristmasji mejembitetba Tsüngrem sempet Khrista alima meimchir asoshi agütsüba mong lir. Iba tangatetba nung nüburtemi Khristmas sempetji agütsütep nungbo koda tajung süla..Ibaji temeshi mapa ka asütsü. Sempet tuluba tajungba agütsütsü aser angutsü bilemba ajanga Khristmas sempet tetezü mangateti Khristmas süidaktsür; Khrista mengui süidaktsür. Khrista amadoker benjung tepelaji dang bilema amonger. TV aser Internet reprangdang tenyartemi atenba ken mangashi süidaktsür. TV repranger, programme repranger saka petinui aniba mangur.

Shirnoki Tsüngrem sempet angateta Pa tenüng sanga pelatepa Khristmas amonger, iba benjung aser tepelaji shidakba benjung aser tepela lir. Asenoki temulungjang tamang tenük kotaklen repranga ya shidi, " Pa mejembitetba sempet asoshi Tsüngrem tenüng sangang." Iba o ya Pauli Khrista indang jembiba masü, mesüra kangki osang mesüra tekümtet tepela mesüra Tebu temeim indang jembiba masü saka Yihuda lima nung sensaker atema sempet , sen tenla bendenba asoshi jembiba o lir. Iba jagi tanüa asenok den jembir. Khrista indang bilemba agi Paul mulungjang sünga liasü, anungji pai jembiba ajak jagi Khrista dangi ani. Mulungsoa agütsütsü indang jembidang pai iba o jembi," Kechiyong asen Kibuba Yisü Khrista takar liaka, aji saka pa sensakba agi nenok takar kümdaksütsü asoshi pa nenok atema sensaker aküm, iba taochi nenoki metet." 2Kor. 8:9.

Shibai Yisü meimer pai//lai Pauli jembiba ama jembitsü.Khrista indang jembiang ta meshii Khristmas amongbaji chichiba Khristmas masü. Khrista indang, pa mapa indang bilemtetta asenoki Khristmas mongdi.

2025 küm reshikangshi ajangshiba Khristan million 380 liasü

December 19, 2025: 2025 küm alima tesem balala nung reshikangshi ajangshiba Khristan million 380 dak tali liasü; talisa North Korea, Somalia aser Yemen linüktem nung aliba Khristantemi reshikangshi kanga ajangshiogo.

2025 küm alima nung Khristan tenet shia nungi kabo reshikangshi kanga aliba tesem nung liasü, ta kasa osang ajanga metetdaksü.

2025 küm pei tamangba yimsü ajanga tepsetba Khristan 4,476 liasü aser Tenla kitem mesüra Khristan kiojen 7,679 amak.

Open Doors World Watch List 2025 nung alima nung Khristantem reshikangshiba linüktem rongnung tamajungtiba 10 ji North Korea, Somalia, Yemen, Libya, Sudan, Eritrea, Nigeria, Pakistan, Iran aser Afghanistan linüktem liasü.

North Korea nung tamangba yimsü khenyongi

memelar, aser ozüng alema inyakterem tepseter mesüra labor camp nung puoker.

Somalia nung Islamic telok Al-Shabab-i Khristan yimsü samatsütsü nükjidong nung Khristantem kanga reshikangshir.

Yemen nung tang civil war lir aser iba ama tensa ka nung Islamic teloktem densema tashi aliba telok balalai Khristantem reshikangshir.

Libya nung sorkar tashimaitba ajanga ozüng alema inyakba telok balalai Khristantem anema inyaker, talisa Islam yimsü toktsür Khristan yimsü agizükertem aser bendanglen nungi aruba aayangertem kanga reshikangshir.

Sudan nung rara aliba dang masü saka ayawara-a lir. Iba ama tensa ka nung Khristantem kanga bendangshidanga züngshir aser Khristantem anema inyaker.

Eritrea nung kijai yimsüsüba kübok tamangba yimsü ajak

azüoker aser Khristantem anema inyakba kanga bulua ataloker.

Nigeria nung Khristantem kanga tepseter mesüra telok balalai Khristan lenirtem aser putirtem puer aoba sülen parnok chioktsü atema sen akhanger. Küm shia alima nung Khristantem teimba tepsetba linükji Nigeria lir, talisa Boko Haram aser Fulani teloki Khristantem teimba tepseter.

Pakistan nung Tsüngrem mezüngmeshiba ozüng kübok Khristantem nem tai tonglokja loktii azüker mesüra tepuokdak ayur.

Iran nung sorkari house churches nokdang aser linük security anema inyakogo, ta tai tonglokja Khristan lenirtem aser Khristantem kanga apur.

Afghanistan nung Taliban yimsüsüba kübok Khristantemi mimshia dang tekülem sentong agitsüsa akümer aser aibelenertembo tepseta indoker.

Iba dak alia 2025 küm India

nunga January ita nungi July ita tashi nung Khristantem anema inyakba tatalokba 334 liasü. Talisa Uttar Pradesh aser Chhattisgarh na nung loktii Khristantem amakba, yimtsüng nungi meindokba mesüra loktiliba nung sendokba kanga bulua atalokogo. India kübok state aika nung anti-conversion ozüngtem nung ajemdaker Khristantem nem tai tonglokja apuba tatalokba aika lir.

Latin America nunga Nicaragua aser Mexico ama linüktem nung Khristantem reshikangshiba kanga bulua kümдар.

Africa nung Nigeria dang masü saka Sahel region (Burkina Faso, Mali aser Niger linüktem) nunga jihadist teloktemi Khristantem anema inyakba kanga bulua kümogo.

Syria linük nunga Assad yimsüsüba menden nungi atsüngdokba sülen Khristantem aika tetsübu nung lir aser tarutsü tia mejangjai lir. Syria nung chiyungtsü aser tzü

agi anüngba den külemi reshikangshi ajanga Khristan aikati iba linük toktsür aoer. Puti otsü nung Khristan yimsü yangerba nung Syria nunger Khristantemi kanga tongtibang shilem agia lir aser iba linük nung akhidang asüba Tenla kitem aser monasteries aika lir.

Akhidang nungi Syria nung Khristan nütsüng aika liasü. 2011 küm tashi nungbo Syria nung Khristan nütsüng million 1.5 dang aküm. Syria nung Islamic kiralongrartemi reshikangshiba aser Syrian Civil War ajanga 2022 küm tashi nungbo Khristan nütsüng 300,000 dang aküm, aser ibaji linük nung nütsüng shilem 2 den ishiba lir.

Alima tesem balala nung Khristantem reshikangshiba kanga bulua akümyonga Yisü Khrista osangtajung maneni proker aser Tsüngrem yimli maneni ainer, ta International Christian Concern (ICC)-i report kanga ajanga metetdaksüogo.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim


Tsünpok

- (v) tashi amshia jara ama nung tapok patsüba (break open)
* Policetemi kishi tsünpoker tua nisung ka apu.

Tsünporet

- (n) tzünglu arua yipru mopong aйдang anüng nungi mi ama
tesangwa yaloktsükba (lightening)
* Tsünporet preta tzünglu arudang mobile phone
mamshitsüla.

OLONG PAITEP # 7365



TIPIEN

1. Mosai züluba kaket ka - (6)
4. Teku nembangba sobutsü - (4)
6. Puteper - (4)
7. Kidang atem yagi yanglur - (6)
10. Teputep - (9)
15. Aori yangluba aon ka - (6)
16. Yirusalem - (4)
17. Per tulu - (4)
18. Ambangyima agiadok - (6)

LANGTSÜNGLEN :

1. Junger ta ashi - (5)
2. Kenüa mati - (4)
3. Tulu masü - (4)
4. Yashi o asüng na yongtsü- (4)
5. Ajurutepdak - (6)
8. Amtak - (3)
9. _ _ _ en - (3)
10. Na shiba - (6)
11. Amo-amor - (5)
12. Noklang nung 97 endok - (4)
13. Kidong ka - (4)
14. Tekong sobutsü - (4)

OLONG PAITEP # 7364 TELANGZÜBA

TIPIEN :

1. Semtu, 3. Lepko, 5. Bilem, 8. Ulu,
10. Tsünpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong, 6. Lungkak,
7. Milak, 9. Zünga, 10. Temopu,
12. Walu, 14. Ali.

NAI-A YA METETTER MA



Pune Book Festival lapoktsüba anogo ka lia December 12, 2025 nü Pune nung 'Largest Display of Posters' otsü tasen ka yanglutetogo. Pune nung India nung oshitem aser tribal words ajak bendena item Posters yanglua liasü aser Guinness World Records-i agizükogo.

Pune Book Festival ya National Book Trust (NBT) ajanga December 13 nungi 21, 2025 tashi ayongzüka amunger.

AIIMS Guwahati-i ATLS provider centre accreditation angu



Guwahati, December 19, 2025 (Agencies): Northeast nung Advanced Trauma Life Support (ATLS) provider centre indang accreditation mezügbuba angubaji AIIMS Guwahati lir.

AIIMS Guwahati nung December 12 nungi 14 tashi mezügbuba ATLS provider course tenzüka agiogo aser iba ya Northeast nung structured trauma education tongtipang mera ka agir asütsü.

Iba accreditation ajanga trauma care practices tajungba akümba sayur. Linük kübok tesem balala nungi ATLS faculty members-i anogo asemnü course nung aden aser parnoki ajangshia arubatem lemsatapa liasü ta AIIMS Guwahati-i metetdaksü.

AIIMS Guwahati nung ATLS course shia shilem agir 16 züngoker aser training module sülen anidaker.

Iba programme nung

intensive hands-on aser classroom sessions ana dena lir aser iba sülen tasemnübuba formal assessment agir.

Northeast nung trauma care capacity tashi itdaksütsü atema iba mapa tenzüker. ATLS training teti agiba ajanga emergency response tajungba, patient outcomes akümtsü aser Northeast nung trauma-related mortality ajema akümtsü ta AIIMS Guwahati-isa metetdaksüogo.

CAU Imphal-i scientific journalism fellowship atema nisung 3 shim

Imphal, December 19, 2025 (Agencies): India Today NE journalist Phurailatpam Keny Devi nem 6th Media Fellowship in Scientific Journalism agütsütsü shimtetogo.

Iba sempet ya Central Agricultural University (CAU), Imphal ajanga agütsür aser iba fellowship atema shimtetba tanga journalist temji- Sangai Express nungi Taorem Bishwajit Singh aser Impact TV nungi Saikhom Ruben lir.

December 16, 2025 nü parnok shimtetba osang metetdaksü aser fellowship applications agüja liasü.

Public Relation and Media Management Cell (PRMM), CAU Imphal nung Information and Publicity Officer aser PRMM Cell Head Dr Indira Thounaojam-i fellowship agütsü.

"University-i tesüiba küm pungu tashi media fellowships agüja arur aser iba ya public dangi academic excellence, research aser scientific findings osang tajungba prokshitsü nükjidong nung lir" ta Dr Thounaojam-i ashi.

Taküm fellowship atema omenji "Futuristic education to power a 30 trillion-dollar India

by 2047" lir.

"Media-i loktiliba yangluba mapa nung tongti shilem agir aser sorkar o nübortem tsüngda apu ama inyaker. Iba fellowship ajanga CAU-i Manipur ama aluyimba dak metaloka state tem nung scientific agricultural practices aser allied sectors indang osang tali prokshinür" ta Dr Thounaojam-isa ashi.

Taküm fellowship atema journalists aikati tenüng agütsü saka expert panel kati jungjunga asadanga reprangba sülen journalists asem- print media nungi ana aser electronic media nungi ka shimtet ta laisa ashi.

Mizoram-i USD 108 million ADB loan angutsü

Aizawl, December 19, 2025 (Agencies): Mizoram sorkari Asian Development Bank den public healthcare system tashi itdaksütsü atema USD 108 million (around Rs 980 crore) loan tenangzüka asoshi sign süteptsü.

"ADB-i tan ita tetenzüklen loan mulunga agizükogo aser iba ya "Supporting Public Healthcare System Strengthening to Achieve Universal Healthcare for Mizoram" mapatong kübok lir ta Health Minister Lalrinpuii-i ashi.

"Centre-i küm 15 tsüngda loan 90% menoktsü aser Mizoram sorkari tanüngba 10% menoktsü. ADB-i loan mulunga agizükogo saka Union Ministry of Finance-i anogo ka shimba sülen ang sorkari agreement nung sign asütsü" ta Lalrinpuii-i ashi.

Centre-i iba loan asoshi sen teimba menokba ajanga state sorkari Mizoram Universal

Health Care Scheme (MUHCS) inyakba nung senotsü ajema endoktsü ta laisa ashi.

Iba agreement nung sign sütepba sülen Disbursement Linked Indicator kübok mezüing ita nung Rs 21 crore agütsütsü.

Chief Minister Lalduhoma-i anir Zoram People's Movement ajanga taküm March ita MUHCS tenzüka liasü.

Iba scheme ajanga küm ka nung kibong shia nem Rs 5 lakh tashi cashless treatment agütsür. Iba scheme ya government hospitals aser empanelled private aser church-run hospitals nung inyaker.

"Tan financial year tsüngda MUHCS kübok kibong 65,193 tenüng züluokogo" ta Mizoram Health Care Society CEO Lalhriatuali Ralte-i ashi.

Iba nung sorkar mapa inyaker kibong 36,323 aser civil pensioners kibong 8,733 lir.

Ayushman Bharat Pradhan Mantri Jan Arogya Yojana kübok züluoka aliba kibong lakh 2.20 temai MUHCS tajangzükttem agütsü akok ta Lalhriatuali-i ashi.

Iba scheme kübok beneficiaries 59,602-i treatment nguogo. Sorkari MUHCS kübok Rs 100 crore tema healthcare expenses nung endokogo ta Lalrinpuii-isa metetdaksü.

Sorkari Aizawl Smart City project kübok Aizawl Civil Hospital tajungba yanglushir. Aizawl Civil Hospital nung operation theatre ka renemogo aser idakji kidney transplant procedures tenzüksü ta laisa ashi.

Sangküm January nungi nephrologists aser healthcare workers-i Kolkata nung training agütsü aser iba sülen Aizawl civil hospital nung kidney transplants asütsü ta Lalrinpuii-isa metetdaksü.

Lanur lenir ka asüba sülen Bangladesh nung rongrong tulu adoka lir

Dhaka, Luchii/December 19 (Agencies): Bangladesh indang taoba ato kilonser Sheikh Hasina atsüngdokba lanurtem telok nung lenir tejangja ka asüba sülen rongrongshirong tulu adoka lir.

Sharif Osman Hadi ya taoba hopta Dhaka nung mosque ka nungi aodang tejak zübanger arua prangbong agi akha aser Singapore nung tema anepalua lia Brihostibarnü asü.

2024 küm Bangladesh nung sorkar anema nüburtem nokdakba sülen mezüngbuba elections agitsü anogo sangdonger anogo ka lir iba azüdokshi ya ataloka liasü. Hadi ya iba election nung independent candidate ka ama tokteptsü sentong liasü.

Brehostibarnü pa asüba osang prokshiba sülen pa bhukumer nisung noklang aika

linük yimtiba Dhaka nung aliba tesem ka nung adenshi.

Iba sülen longkak aiter temi Bangladesh osangkaket The Daily Star aser Prothom Alo indang office tem raksatsü aser ki ka nung mi senlochtsü.

Iba tesemi sepaitem yok aser firefighters temi ki telung nungi madokteti aliba osangbener tem kumzüka liasü.

(Maneni tapak 8 nung...)

EU-i Ukraine nem sen €90bn aputsütsü renemogo

Brussels, Luchii/December 19 (Agencies): European Union lenirtemi Russia indang rongsen soita aliba Ukraine nung amshitsü memulungtepba sülen sen €90bn (£79bn; \$105bn) aputsütsü züngzüktepogo.

Brussels nung senden ka nung anogo ka dak tali jembiba sülen iba tezüngzüktep ya yanglu, koba Ukraine indang

mitkar aser rongsenketzüng tsütsü nüngdakba küm ana peritsü ta lenirtemi ashir.

"Onoki azüngashitep, onoki inyak," ta EU tekolak Antonio Costa-i social media X nung bloc indang common budget teyari nung sen aputsütsü tezüngzüktep sangdonga zülü.

Ukraine Tir Volodymyr Zelenskyy-i lenirtemi dang Russia nunger rongsen soita aliba nungi sen €200bn amshitsü ajungshia liasü, saka Belgium-i memulung, kong Russia sen aika soita lir.

Zelenskyy-i European lenirtemi dang iba tezüngzüktep asoshi pelar ta ashi, koba ozüi meranga nokdangba tashi itshitsü asoshi teyari tulu lir ta ashi.

Pai social media X nung, Russian rongsen marakzüi ayutsü tongtipang liasü ta ashi aser "Telemtetba tajung aser telungjem asoshi kanga pelar," ta ashi.

Soita aliba Russia nunger rongsen amshitsü melen sen apua Ukraine nem agütsütsü telemtetba agiba ajanga EU lenirtemi rongrongshirong aser telemsa paidoktetogo, ta Belgium Ato Kilonser Bart De Wever-i Hokulbarnep shia liasü.

"Onok lungjema lir," ta De Wever-i ashi.

Ukraine ita ishika tsüngta sen agimatsüsa tensa nung lir, aser meyi metenzükdang senotsü lenmang mongutetra Ukraine-i drones yangluba ajemtsüsa akumtsü ta Zelenskyy-i ashi.

Taruba küm ana atema Ukraine-i sen €135 billion tali nüngdaker aser April ita nungi senotsü agi anünga akumtsü ta EU-i asadangteta lir.

German Chancellor Friedrich Merz, shibai Russia rongsen agütsütsü meranga jembi, pai sen aputsütsü telemtetba agiba ajanga Putin dangi osang tejangja ka yoker, ta ashi.

Russia-i EU lenirtemi dang par indang sen mamshitsü tekumandangtsü shia lir, saka Poland Ato Kilonser Donald Tusk-ibo yamaji inyaktsüsa akumtsü ta ashi.

US Tir Donald Trump-i Russia indang rara tembangtsü asoshi tekeraba nung tezüngzüktep ka agitsü merangba mapang iba agreement yagi Kyiv nem kanga nüngdaka aliba teyari agütsütsü.

US aser Russian ketdangsürtem yimjung sentong ka atema jembishinütsü tan hopta tatemlen Miami nung ajuruteptsü lir. Iba mapang Kremlin envoy Kirill Dmitriev-i Trump envoys Steve Witkoff aser Jared Kushner den ajuruteptsü imlar.

Kasa mapang Zelenskyy-ia Ukraine aser US delegations tem United States nung Hokulbar aser Honibarnü senden amentsü ta sangdonga lir.

MOPUNGCHUKET BAPTIST AROGO

Quasquicentennial Benjungmong

Anogo : 27th - 28th December 2025



OMEN: KHRISTA AJANGA YIMJUNG

Tongti O Jembir

1. Rev. Tamsü Jamir, Executive Secretary, ABAM Impur

2. Dr. Sashinungla Pongen, Associate Professor, OTS Dimapur

3. Rev. Dr. A. Tali Ao, Academic Dean, CTC Aolijen

Jubilee Tezülor

1. Wb. Meyimangyang Ozüküm

2. Kr. Imcharenla Aier

Tekülem aser Tetushi Tanir

1. Wb. Enyar Jamir

2. Wt. Moakümla Jamir

3. Wt. Amongbi Jamir

4. Wb. Tiayapang Aier

5. Wb. Chubawapang Lemtur

6. Wb. Tzüti

Washimong Saya Tanir

1. Wb. Mozen Aier

2. Dr. Butesen Ozüküm

3. Kr. Sentiben Jamir

Luchii (Dec) 27th Küptoknü

QQC NÜNGSHI LUNG (MONOLITH) LAPOKBA

Sentong

MAPANG: 4:30 PM

Telapoktsür:

REV. DR. WATI AIER

Emeritus Professor of Constructive Theology & Philosophy, OTS and Convener of FNR

1. Sentong Lenir : Dr. Chuba Aier, President, MTF

2. QQC Jubilee Sangdong : Tsüngrem Nükjang Yimti

3. Nüngshi Lung Lapok

TEKÜLEM I

MAPANG: 5:00 PM

Onük: KHRISTA DEN KÜM 125

Tejembir:

Dr. Sashinungla Pongen, Associate Professor, OTS
Kongki Atemer: Kr. Jungtiben Aier

Tekülem aser Tetushi:

1. Sentong Lenir : i. Wb. Kika Aier
ii. Kr. Akangsüngla Lemtur

2. Jubilee Lapok : Christian Education Ministry, MBA

3. Sarasademsü : Wb. I. Lanu Longkümer, Pastor Kubolong BA

4. Pela-a Agizükba : Wb. K. Bendang Lemtur, Deacon MBA

5. Longrar : Wt. K. Imtisenla Ozüküm

6. Khristar Benjungmong : Tanir i. Wt. Imtila
ii. Wt. Asangla
iii. Wb. Putimeren Ozüküm

7. Salem O : i. Rev. Dr. Akok Amer, Pastor Impur BA
ii. Wb. I. Kilen Longchar, Pastor Sungratsü BA
iii. Wb. P. Tenzük Jamir, Pastor Aosüngküm BA

8. QQC Kakat Saya : Pastor, MBA

9. Lanlia : Dr. N. Moa Jamir, Dimapur

10. Pa Nüng Sangang : Jubilee Choir, MST Mokokchung Town

11. Tsüngrem O

12. Tatem Sarasadem : Wb. B. Yashi Longkümer, Pastor Khanimu BA

TEKÜLEM II

Luchii (Dec) 28th Amungnü

MAPANG: 10:00 AM

Onük: KHRISTA AJANGA YIMJUNG

Tejembir:

Rev. Tamsü Jamir, Executive Secretary, ABAM Impur
Kongki Atemer : Kr. Rongnen Jamir

Tekülem aser Tetushi

1. Sentong Lenir : i. Wb. Imtimenba Jamir
ii. Wt. Moashila Aier

2. Lai Zünger Sarasademsü : Rev. I. Asenla Jamir, APW Aoyimkü BA

3. QQC Sangro : Kr. Moalen Jamir

4. Tepela O : i. Wb. Lanukümzü, Pastor Khar BA
ii. Wb. Senti Longchar, Pastor Longjang BA
iii. MST Kohima

5. Teimla

6. Khonang Tetushi

7. Ajungshi O : Imyumeren Jamir, Tatar

8. Ni Ya Shinür : Er. Atoba Imchen, EE NPWD

9. Jubilee Tenla : Rev. Maong Lemtur, Director WEC-IMM, NEI

10. Ayongzükba O : Wb. Meyipokym Aier, IFS (Retd.)

11. Khrista Ajanga Yimjung : Jubilee Choir, Mopungchuket BA

12. Tsüngrem O

13. Tatem Sarasadem : Wb. I. Toshi Longkümer, Pastor Alongchen BA

QQC Lokti Chiyong Sarasademsü

Rev. Dr. P. Tali Jamir

TEKÜLEM III

MAPANG: 4:30 PM

Onük: NENOK KÜ KULITEM

Tejembir:

Rev. Dr. A. Tali Ao, Academic Dean, CTC Aolijen
Kongki Atemer: Kr. Sayana Jamir

Jubilee Saya

Tekülem aser Tetushi

1. Sentong Lenir : i. Wb. Süpongasang Jamir
ii. Kr. Yapanginla Ozüküm

2. Sarasademsü : Wb. Tamsü Jamir, Pastor Longjang Compound BA

3. Tepela O : i. Wb. Bendang Lemtur, Pastor Longpa BA
ii. Wb. Wati Kichu, Pastor Chami BA

4. Pa Meim Kuli Südi : MST Chümoukedima

5. Züngkümshidi : Rev. Dr. W. Along Jamir,
Director (Translation) BSI Bengaluru

6. Molungnen O : Wb. Lender Jamir, Convenor QQC Planning Committee

7. Salem O : Rev. Jongpong, Pastor Mopungchuket BA

8. Yimjung Otsü Tatem : Jubilee Choir, MST Dimapur

9. Tsüngrem O

10. Jubilee Shibang : MALT Kohima

11. Sarasademsü : Wb. Tenzük Jamir, Pastor Longjongkong BA

Washimong Saya

TEMETETTSÜ:

1. Mapang telemsa yamai alitsü:
i) Onük Jembir - 25 minutes
ii) Lanlia, Ajungshi O, Ni Ya Shinür, Ayongzükba O, Züngkümshidi - 7 minutes
iii) Tepela O, Salem O - 5 minutes

2. QQC Timsür MALT nungi nebu 60 agitsü.

3. Jubilee mapang traffic anepalur Meijensanger Lanur Mokokchung Town.

4. Iba sentong nung Mopungchuket Sensosanger, Anükapang aser Tetsü Tamu ajak pelashishia jaoker.

5. Sentong takok aser temoatsü asoshi sarasadema atadi.

Idakia reprangtettsü



@mopungchuketarogo

Morocco-i FIFA Arab Cup 2025 kokogo



Doha, Luchii/December 19 (Agencies): Hokulbarnü Lusail Stadium, Qatar nung FIFA Arab Cup final asayaba nung Morocco-i Jordan madak goal 3-2 agi takok ngua iba asayamung takok marok bener ogo.

Oussama Tannane ajanga goal tajung ka agütsüba sülen Abderrazzaq Hamed-Allah-i goal ka agütsüba ajanga Jordan nungi Ali Olwan-i goal ana agütsüba amajok akum.

Jordan indang goalkeeper Yazeed Abulaila-i meimlai lia

Tannane-i mezüing goal agüja liasü.

Second half tenzüker minute asem buba nung Olwan-i sako kumdaktsüba ajanga Jordan asoshi asaya melenshir ama liasü, aser ano minute 20 lir penalty nung goal ka yoka par timba akum.

Ajisüaka asaya minute 90 atongtsü minute asem lia substitution nungi Hamed-Allah aita goal ka agüja mapang tali apuloka asayatsüsa akum.

Ano maneni Hamed-Allah-

isa minute 100 buba nung ano goal ka agüja liasü.

Arab Cup nung Morocco ya mezüing Comoros den asayadang 3-1 agi takok angu aser Oman den asayaba mapang nung 0-0 nung asaya tembanga liasü.

Iba sülen Saudi Arabia aser Syria madak kasa 1-0 agi takok angu aser semifinals nung United Arab Emirates madak 3-0 agi takok ngua liasü.

Ibai Morocco asoshi Arab title tanabuba alitsü, koba parnoki 2012 nunga koka liasü.

Jake Paul-i alima aoksatsütsü nangzük

Miami, Luchii/December 19 (Agencies): Miami nung Brehostibar aonung official weigh-in mapang taoba heavyweight world champion Anthony Joshua ayong ayonga seret odangtetogo, shiba 'social media boxing disruptor' Jake Paul den tsüngteptsü.

Joshua, shiba tsüngteptsü indang ozüing kübok temang tuozük 245 pounds (111kg) dak tali masütsü lir, pa Brehostibar aonung seret odangba nung 243.4 pounds (110kg) liasü.

Joshua (28-4, 25 KOs) ya taoba mapang heavyweight classification nung temang tuozük 250 pounds (11kg)

nung tsüngtepa aru, aser September 25, 2021 nung Oleksandr Usyk den tsüngtepa mapang temang tuozük 240 pounds (109kg) akumba sülen tang tebongbaba alitsü.

Paul (12-1, 7 KOs) temang tuozük 216 pounds (98kg) liasü - saka Britain nungba dang 12.7 kilogrammes agi tajemba aser 13 centimetres agi tar tatsüba alitsü.

America nunger Paul ya teti 91kg (200 pounds) nung lir.

Iba weigh-in sülen Paul-i ashiba agi, Hokulbarnü pai alima aoksatsütsü.

"Ni tetsübo menemteter. Pa tenük nung ni langka angur," ta Paul-i ashi.

"Pa tebilemtsü bener

tsüngteptsü. Ni tebilemtsü maka. Ni kokogo. Pa atema ibai tamakok tensa lir. Ni aginüba ama tensa nung pa lir," ta ashi.

Joshua-i, "Ni iba tanur dang tajungba asütsü. Ni temulung agüja tsüngteper ka lir," ta 2012 Olympic champion-i ashi.

Tena ya Miami indang Kaseya Center nung Hokulbar aonung 10:30 ako nung tsüngteptsü.

Tena tsüngtepa ya round ti alitsü aser 10-ounce gloves amshitsü.

Joshua ya 2024 küm September ita küsa Britain nunger Daniel Dubois-i knockout agütsüba sülen tang mesüing tsüngteper alitsü.

Allianz Arena nung UEFA Champions League Final 2028 asayatsü

Munich, Luchii/December 19 (Agencies): Bundesliga champions Bayern Munich indang Allianz Arena nungya Ano UEFA Champions League final ka 2028 nung asayatsü, ta European football governing body ajanga jangjatsüogo.

2029 final asayatsü atema England indang London nung aliba Wembley Stadium aser Barcelona indang tang yanglushir aliba Camp Nou rakteper.

UEFA-i par züngsem nungi iba asayamung final ayongtsü

jangra alirtem tenüing sangdong, anungji New York nung final ka asayatsü südi ta mapang talangka nungi olulu prokshia aruba ya 2030 tashi masayatettsü Hokulbarnü jangjaogo.

Jangra alirtem sangdongba ya tatem masü aser final proposals ya June 10 tahsinung agütsütsüla, ta UEFA-i ashi.

Munich nung taoba season final asaya aser 2024 küm final ya Wembley nung asaya. Barcelona nung 1999 küm nungi UEFA Champions

League final masayai arur.

2028 aser 2029 nung all club competition finals asayatsü atema UEFA executive committee-i taruba küm September ita telemtetba agitsü.

Tang season indang Champions League final ya Budapest nung aliba Puskas Arena nung asayatsü, kong Europe nung kera asaya tenzüka mapang tasen ka asütsü aser 2027 final ya Atletico Madrid indang stadium nung asayatsü.

BWF World Tour Finals: Ratchanok teimla mesamai lir

Hangzhou, Luchii/December 19 (Agencies): Thailand tsür taoba world champion Ratchanok Intanon-i tetsürtem kija asaya Group B nungi meraloka asayatsü maongka mesamadaktsüi Hokulbarnü BWF World Tour Finals indang preliminary league stage nung China tsür seed asembuba nung alila Han Yue madak ayong-ayonga takok angu.

Hangzhou Olympic Sports Centre Gymnasium indang Court 1 nung asayaba nung Ratchanok-i minute 38 nung Han Yue madak 21-17, 21-10 agi takok ngua liasü.

Kasa mapang Group A nung Korea tsür top seed Se Young aser Akane Yamaguchi na iba group standings tematiba tongteta semifinals asayatsü jangjaogo.

Se Young ya iba telok nung khen danga tamakok ajurua mali aser asemben asayaba nung asemben takok nguogo, aser Yamaguchi ya asaya asem nungi ana nung takok ngua tanabuba jenjang nung tembang. Indonesia tsür Putri Kusuma Wardani ya asaya asem nungi ka nung takok ngua point ka bener tasembuba jenjang nung tembang aser Tomoka Miyazaki ya asayar pezü aliba telok nung tamakok asem ajurua points kata mali tsünglangba nung tembang.

Se Young-i seed pezü buba nung alila Yamaguchi den minute 47 asayar mezüing set



nung tamakok ajuruaka 13-21, 21-5, 21-14 agi akok.

Kasa Court 2 nung asaya ka nung Indonesia tsür Putri-i Japan tsür Tomoka Miyazaki den minute 38 asayar 21-17, 21-9 agi akok.

Nikongdang asaya nung India nunger Satwiksairaj Rankireddy aser Chirag Shetty nati Group B nung Malaysia nunger seed tanabuba nung aliba Aaron Chia aser Soh Wooi Yik den asayatsü.

Brehostibarnü India nunger tarep asayar Satwiksairaj Rankireddy aser Chirag Shetty nati BWF World Tour Finals 2025 asaya tanabuba takok nguteta Indonesia nunger Fajar Alfian aser Muhammad Shohibul Fikri madak set asem asayar koka liasü.

India nunger tarep asayar ana ya world no. 3 lir aser Group B nung 21-11, 16-21, 21-11 agi Indonesia nunger madak takok ngua semifinal asayatsü teimla tulu nung lir.

BENDANGLI OSANG : Tapak 7 nungi...

Lanur lenir ka asüba sülen Bangladesh...

Arishi küm 32 tain Hadi ya kaketshir longkak aitba telok Inqilab Mancha nung lenir ka aser India anema tasü ita jembir ka liasü. Hasina ya India nung jenoka lir.

Bangladesh political party temi pa asüba mang ayimer aser interim government dang iba mapa tamajung inyaker nem obendang shidak agütsütsü ajungshir.

Bangladesh interim government nung tekolakba aser Nobel sempet angur Muhammad Yunus-i Hadi asüba ya linük asoshi yanglushitsü makokba takoksa tulu lir ta ashi.

"Democracy tsütsü linük jaja aoba ya tetsübo, kiralongra mesüra azüdokshi agi manendaktsütettsü," ta pai Brehostibarnü television ajanga ashi.

Bangladesh interim

government-i Honibarnü linük ajunga nung mang ayimtsü sangdongogo.

Hadi dak akhaba sülen, ibai jelia nungi tasa yanglur inyakba lir aser election raksatsütsü nükjidong nung inyak ta Yunus-i ashi.

Hadi tepsetba indang bushisüngdangba mapang lir aser nisung kar pua lir.

Kaketshir temi anir hopta aika longkak aitba ajanga Hasina ya taoba küm August 5 nü India-i jena oa lai küm 15 yimsü süa aruba tembanga liasü.

Longkak aiter dak tashi tesashi amshitsü melaba nung la aibelenba nguteta nisung meimchir anema mapa tamajung inyakba atema November ita la tasüba agi merenshitsü obendang agüja liasü. Iba longkak aitba mapang Bangladesh nung nisung 1,400 shi asü.

BILEMDANGANG

"Asenok tulu akumtsü merandang tilala ainer."